

## ANEXO III

### PROPOSTAS DA ASOCIACIÓN ANIMALISTA LIBERA RECOLLIDAS NO MANIFESTO POR OS ANIMAIS

#### INTRODUCCIÓN

Aos cidadáns fáisenos familiar unha expresión utilizada con frecuencia na política: “Folla de ruta”. Suponse que nela se desglosan os prazos para todas e cada unha das accións de goberno que figuran no programa.

As propostas animalistas, lonxe de empobrecer a declaración de intencións dun partido político ou de implicar a falta de atención ante outros problemas, supoñen unha riqueza en si mesmas, traendo consigo beneficios en áreas aparentemente alleas ao maltrato animal, pero profundamente relacionadas co mesmo.

#### TOURADAS

O financiamento de espectáculos crueis como as touradas continúa a ser unha constante nalgunhas vilas galegas. Resulta evidente que sen achegas económicas, a realización de festexos taurinos non tería lugar na nosa sociedade. É prioritario rescindir o uso de fondos públicos para actividades nas que se tortura animais como parte dun ocio macabro.

#### COMERCIO

O comercio de animais de compañía supón un lucrativo negocio para empresas e cidadáns particulares que deciden criar seres vivos de maneira alarmante. Estes negocios tamén son a principal causa do abandono de animais, que en Galicia superou os 8000 seres en 2010, unha cifra escandalosa.

É necesario restrinxir o comercio e a apertura de novas tendas, ademais de vetar a exhibición pública destes animais co obxectivo de evitar as compras compulsivas.

#### MONTES

A colocación das coñecidas como “pexas” nas patas dos cabalos, a morte violenta doutros animais por mor de disparos ou puñaladas, a caza, os lazos, merecen unha resposta contundente por parte das administracións.

É necesario impulsar fórmulas supramunicipais que permitan esixir á Xunta de Galicia medidas drásticas contra os crimes da fauna en liberdade nos montes galegos.

#### ABANDONO

O cumprimento da lexislación vixente en materia de protección animal é nulo en grande parte dos concellos. A pesares de ter competencias en materia de recollida e custodia de animais abandonados, poucos consistorios asumen tales obrigas, coa con seguinte carga de traballo sobre entidades non lucrativas. O abandono é problema de tod@s. Hai que crear sinerxías entre o tecido asociativo e as institucións, apoiando campañas de esterilización dos animais da rúa, construindo refuxios supramunicipais e rexeitando o sacrificio a favor dunha política eficaz de adopcións.

#### CIRCOS

A utilización de seres vivos, salvaxes ou domésticos, no século XXI supón condenar a centos animais a unha vida chea de sufrimento e situacións alleas ao seu comportamento natural.

Leóns saltando aros de fogo, elefantes malvivindo na parte traseira dun camiión, ou simios e xirafas adestrados a paos son algúns dos exemplos da penosa existencia dos animais nos circos. É prioritario vetar o acceso destes espectáculos ambulantes nos termos municipais. Ningunha vila galega pode permitir o maltrato dos circos que empreguen animais.

## **É O MOMENTO**

As vindeiras eleccións municipais, do 22 de Maio, son unha oportunidade única para apostar pola protección e defensa dos animais. Necesitamos políticos comprometidos, que crean nas súas propostas e nas súas posibilidades de acadar máis dereitos para os seres vivos. Este manifesto pretende crear unha reflexión acerca do tratamento que damos aos animais, e da protección que dende os concellos galegos se lles facilita, ou se tenta facilitar.

As touradas, os circos, o abandono, o comercio, a crueldade cos animais ceibes, e tamén a violación sistemática da lexislación actual son retos que debemos afrontar con valentía e cunha postura animalista.

Só desta maneira poderemos dicir que avanzamos como sociedade e país.

